



Broj: 05-04-20-2898-11/25
Maglaj, 15.08.2025. godine

Na osnovu člana 70., u vezi sa članom 64. stav (1) tačka b) Zakona o javnim nabavkama („Službeni glasnik BiH“, br. 39/14, 59/22 i 50/24), člana 25. Pravilnika o javnim nabavkama u Općini Maglaj („Službene novine Općine Maglaj“, broj 13/22) i člana 42. Statuta Općine Maglaj („Službene novine općine Maglaj“, br. 8/07, 3/08, 6/08 i 6/24), a u vezi sa Zapisnikom o pregledu i ocjeni ponuda, broj 05-04-20-2898-9/25 od 15.08.2025. godine, u postupku javne nabavke „Rekonstrukcija Trga i Parka Ljiljana sa spomen-obilježjem“, Općinski načelnik donosi

ODLUKU

o izboru najpovoljnijeg ponuđača

I

Prihvata se preporuka Komisije za javne nabavke i ugovor o nabavci radova na rekonstrukciji Trga i Parka Ljiljana sa spomen-obilježjem, dodjeljuje se ponuđaču „Hajdić“ d.o.o. Maglaj, u skladu sa ponudom broj 39/25 od 30.07.2025. godine, po ukupnoj cijeni od 341.708,75 KM bez PDV-a, odnosno 399.799,24 KM sa uračunatim PDV-om.

II

Izabrani ponuđač iz tačke I obavezan je dostaviti dokumentaciju koja je tenderskom dokumentacijom utvrđena kao dokumentacija koju dostavlja izabrani ponuđač, u roku od pet dana od dana zaprimanja ove odluke.

III

Za realizaciju ove odluke zadužuje se Služba za urbanizam, geodetske i imovinsko-pravne poslove Općine Maglaj.

IV

Ova odluka dostavlja se svim ponuđačima koji su učestvovali u postupku javne nabavke i ima se objaviti na internetskoj stranici Općine Maglaj.

Obrazloženje

Odlukom o pokretanju postupka, broj 05-04-20-2898-1/25 od 09.07.2025. godine, pokrenut je postupak javne nabavke „Rekonstrukcija Trga i Parka Ljiljana sa spomen-obilježjem“, putem otvorenog postupka. Predmetna javna nabavka objavljena je na portalu javnih nabavki, obavještenje o nabavci broj 1140-1-3-86-3-73/25 od 09.07.2025. godine. Sažetak obavještenja o nabavci objavljen je u „Službenom glasniku BiH“, broj 42/25.

Procijenjena vrijednost nabavke je 341.880,34 KM bez PDV-a, odnosno 400.000,00 KM sa PDV-om, a kriterij za dodjelu ugovora je najniža cijena.

Postupak je, u skladu sa svojim nadležnostima, provela Komisija za javne nabavke imenovana Odlukom Općinskog načelnika, broj 05-45-1-926/25 od 22.05.2025. godine (u daljem tekstu: Komisija). U toku postupka, Komisija je zaprimila pristigle ponude, izvršila njihovo otvaranje, pregled i ocjenu, prema zahtjevima i kriterijima iz tenderske dokumentacije, o

čemu je sačinila odgovarajuće zapisnike, u skladu sa čl. 63. stav (5) i 65. stav (2) Zakona o javnim nabavkama.

U predmetnom postupku, Komisija je utvrdila da su blagovremeno zaprimljene tri ponude, prema redoslijedu zaprimanja kako slijedi:

r/ b	Naziv ponuđača	Sjedište ponuđača	Datum i vrijeme zaprimanja	Broj protokola
1.	Konzorcij "Geo-put" d.o.o. Maglaj i "Porobić" d.o.o. Zavidovići	Poljice bb, Maglaj Radnička ulica bb, Zavidovići	28.07.2025. 13,50h	6753
2.	Konzorcij "DKM gradnja" d.o.o. Maglaj i "Dževkomerc inženjering" d.o.o. Zavidovići	Viteška bb, Maglaj Dubravački put bb, Zavidovići	29.07.2025. 14,17h	6809
3.	"Hajdić" d.o.o. Maglaj	Misurići bb, Maglaj	30.07.2025. 08,12h	6820

Neblagovremenih ponuda nije bilo.

Sve zaprimljene ponude su prihvatljive prema formi, obliku i potpunosti, odnosno dostavljene su u zatvorenim kovertama, na kojima su bili navedeni svi podaci traženi tenderskom dokumentacijom. Komisija je potom, na zatvorenoj sjednici, započela pregled i ocjenu ponuda, prilikom čega je utvrdila da se u sve tri ponude iz dostavljenih potvrda o ranije izvršenim ugovorima ne može utvrditi da li ponuđači posjeduju iskustvo u izvođenju srodnih radova, kako je to traženo tenderskom dokumentacijom (postavljanje betonskih kocki, popločavanje trgova i staza, oblaganje betonskih zidova kamenim pločama...), te su od ponuđača zatražena pojašnjenja dostavljenih referenci, u skladu sa članom 48. stav (5) Zakona o javnim nabavkama. Krajnji rok za dostavu pojašnjenja bio je 04.08.2025. godine u 10,00h.

Ponuđač „Hajdić“ d.o.o. Maglaj je u prilogu svog pojašnjenja, zaprimljenog 31.07.2025. godine, dostavio sve ugovore za koje su dostavljene potvrde u ponudi (sa okončanim situacijama u prilogu) iz kojih je Komisija utvrdila da ovaj ponuđač posjeduje ranije iskustvo u izvođenju srodnih radova, između ostalog i postavljanje betonskih kocki, popločavanje trgova i staza, te oblaganje betonskih zidova kamenim pločama. Shodno tome, Komisija je ovu ponudu ocijenila prihvatljivom.

Grupa ponuđača/konzorcij "DKM gradnja" d.o.o. Maglaj i "Dževkomerc inženjering" d.o.o. Zavidovići je u prilogu svog pojašnjenja, zaprimljenog 04.08.2025. godine u 08,40h, dostavio predmjere radova za Ugovor o izvođenju radova na izgradnji spomen obilježja branioci Bijeke Ploče i Ugovor o izvođenju radova na sanaciji eksterijera Doma MZ Misurići. Za Ugovor o izvođenju radova na vanjskom uređenju oko poslovno-skladišnog objekta "Neri" d.o.o. Maglaj nije dostavljen predmjer radova niti druga dokumentacija iz koje bi Komisija mogla utvrditi karakter izvedenih radova, ali je ponuđač konstatovao da su u okviru tog projekta izvedeni radovi na ugradnji mermernih ploča u količini od 71 m², ukupne vrijednosti 24.140,00 KM bez PDV-a. Razmotrivši Pojašnjenje, Komisija je prihvatila dostavljene reference, cijeneći da se radi o radovima koji su srodni radovima koji su predmet ove nabavke. Međutim, ponuda je u konačnici ocijenjena neprihvatljivom, jer, bez obzira na srodnost, ukupna vrijednost predmetnih radova ne ispunjava minimum tražen u tenderskoj dokumentaciji. Naime, zahtijevana vrijednost ranije izvedenih relevantnih radova je minimalno 340.000,00 KM (bez PDV-a), a ukupna vrijednost radova za koje je ovaj konzorcij dostavio obrazloženje i koji su prihvaćeni kao srodni je 86.395,05 KM. Preostali dio radova

na vanjskom uređenju oko poslovno-skladišnog objekta "Neri" d.o.o. Maglaj (izuzev ugradnje mermernih ploča) nije pojašnjen, tako da Komisija nije mogla utvrditi koji radovi su obuhvaćeni tim vanjskim uređenjem, odnosno da li su i oni srodni sa radovima koji su predmet ove nabavke, ili nisu. Zbog toga dostavljena referenca nije prihvaćena u potpunosti, nego samo u dijelu (iznosu) koji je obrazložen. U Pojašnjenju se također navode i radovi koji su izvedeni za fizička lica, kao i radovi po Ugovoru o izgradnji prilaznog puta i završetku potpornog zida na ulazu u Tvrdavu Općina Maglaj, od 15.10.2019. godine, međutim ovo Komisija nije mogla prihvatiti, jer nije navedeno u dostavljenoj ponudi, a pojašnjenje referenci se odnosi samo na reference koje su sastavni dio ponude.

Grupa ponuđača/konzorcij "Geo-put" d.o.o. Maglaj i "Porobić" d.o.o. Zavidovići nije dostavio traženo pojašnjenje referenci. Karakter ranije izvedenih radova, za koje su članovi konzorcija dostavili potvrde u okviru ponude, Komisija je utvrdila iz naziva ugovora, odnosno pojedinačnih radova navedenih u dostavljenim potvrdama. Kako se navodi u zapisniku o pregledu i ocjeni ponuda, u pitanju su radovi koji se odnose na asfaltiranje cesta, sanaciju, rekonstrukciju i izgradnju saobraćajnica, održavanje saobraćajnica, sanaciju udarnih rupa, izgradnju platoa, betonske i AB radove, okolno uređenje oko objekata, izgradnju trotoara, uređenje parkinga, sanaciju šetališta, isporuku i ugradnju tampona, rušenje i izgradnju objekta, isporuku industrijskih sirovina, vanjsko uređenje objekta, sanaciju korita rijeka, nasipanje saobraćajnica, izgradnju cjevovoda, ugradnju krečnjačkog materijala, izradu tehnološke kanalizacije, izgradnja tucaničke podloge, izradu, montažu i demontažu ograda, izradu sportskog igrališta, sanaciju klizišta, stabilizaciju terena, te sanaciju komunalne infrastrukture, u ukupnoj vrijednosti većoj od 6.000.000,00 KM. Komisija je utvrdila da je dio radova srodan sa dijelom radova koji su predmet ove javne nabavke, s obzirom da se radi o radovima niskogradnje. Međutim, Komisija nije mogla utvrditi da li konzorcij posjeduje iskustvo u izvođenju radova postavljanja betonskih kocki, popločavanja trgova i staza, te oblaganja betonskih zidova kamenim pločama, koji čine preovladavajući dio predmjera i predmetne javne nabavke, zbog čega je i traženo pojašnjenje referenci, koje nije dostavljeno. Kako se navodi u zapisniku o pregledu i ocjeni ponuda, iako je u dostavljenim referencama naveden niz uspješno završenih projekata velike vrijednosti, Komisija je prilikom ocjene fokus stavila na to da li članovi konzorcija imaju dokazano iskustvo upravo u onim vrstama radova koji čine glavninu ove konkretne javne nabavke, a to su postavljanje betonskih kocki, popločavanje trgova i staza, te oblaganja betonskih zidova kamenim pločama.

Dakle, Komisija je utvrdila da konzorcij "DKM gradnja" d.o.o. Maglaj i "Dževkomerc Inženjering" d.o.o. Zavidovići, te konzorcij "Geo-put" d.o.o. Maglaj i "Porobić" d.o.o. Zavidovići ne ispunjavaju uslove za kvalifikaciju koji se odnose na tehničku i profesionalnu sposobnost, budući da nisu dokazali iskustvo u izvođenju srodnih radova, kako je to traženo tenderskom dokumentacijom, zbog čega su njihove ponude obačene kao neprihvatljive.

Ugovorni organ ovakvo postupanje Komisije prihvata kao ispravno, uvažavajući da suština odbacivanja ponuda leži u tome što je, prema stavu Komisije, glavnina radova iz ove javne nabavke (i po količini i po značaju) vezana upravo za postavljanje betonskih kocki, popločavanje trgova i staza, te oblaganje zidova kamenim pločama. Ovi radovi čine preovladavajući dio predmjera i srž same rekonstrukcije Trga i Parka Ilijana sa spomenobilježjem, dok su ostali zahvati (iskopi, asfaltiranje, betonski radovi itd.) sporedni, odnosno manjeg značaja. Stoga ne bi bilo utemeljeno prihvatiti ponudu ponuđača koji je dokazao iskustvo u izvođenju isključivo ovih radova, ali ne i radova koji su specifični za predmetnu nabavku i kao takvi istaknuti u tenderskoj dokumentaciji (postavljanje betonskih kocki, popločavanje trgova i staza, oblaganje betonskih zidova kamenim pločama).

Nakon analize i ocjene prihvatljivosti ponuda, Komisija je izvršila provjeru računske ispravnosti prihvatljive ponude, prilikom čega je u ponudi „Hajdić“ d.o.o. Maglaj uočena računska greška, koja je ispravljena u skladu sa članom 17. Uputstva za pripremu modela tenderske dokumentacije i ponuda („Službeni glasnik BiH“, br. 90/14 i 20/15). Ponudač je, aktom broj 10-2/25 od 14.08.2025. godine, prihvatio ispravku računske greške.

E-aukcija u predmetnom postupku nije održana, s obzirom da je, nakon pregleda i ocjene ponuda, preostala samo jedna prihvatljiva ponuda, i to:

r/ b	Naziv ponuđača	Cijena / KM bez PDV-a	Cijena / KM sa PDV-om
1.	„HAJDIĆ“ D.O.O. MAGLAJ	341.708,75	399.799,24

Po završetku poslova koji spadaju u njenu nadležnost, Komisija je sačinila zapisnik o pregledu i ocjeni ponuda, u kojem je detaljno navela sve informacije relevantne za predmetni postupak, kao i preporuku rukovodiocu ugovornog organa da ugovor za nabavku radova na rekonstrukciji Trga i Parka ljiljana sa spomen-obilježjem, dodijeli ponuđaču „Hajdić“ d.o.o. Maglaj. Preporuka je, zajedno sa izvještajem o radu Komisije, dostavljena rukovodiocu ugovornog organa 15.08.2025. godine.

U postupku donošenja ove odluke, posebno su cijenjene činjenice da je Komisija, sastavljena od stručnih lica, pravilno i potpuno izvršila ocjenu kvalifikovanosti ponuđača, te ocjenu pristiglih ponuda, u skladu sa kriterijima iz tenderske dokumentacije. Ugovorni organ nije našao nepravilnosti niti propuste u radu Komisije, koji bi eventualno bili osnov za neprihvatanje date preporuke za izbor najpovoljnijeg ponuđača i dodjelu ugovora. Uvidom u priloženu dokumentaciju, utvrđeno je da je Komisija u svemu pravilno postupila, u skladu sa svojim ovlaštenjima i relevantnim propisima, detaljno obrazlažući svoje radnje u svim fazama postupka, zbog čega je ugovorni organ utvrdio da je izbor najpovoljnijeg ponuđača izvršen u skladu sa Zakonom o javnim nabavkama, podzakonskim aktima i tenderskom dokumentacijom.

Na osnovu izloženog, a primjenom člana 64. stav 1. tačka b) Zakona o javnim nabavkama, odlučeno je kao u dispozitivu.

POUKA O PRAVNOM LIJEKU: Protiv ove odluke može se izjaviti žalba Uredu za razmatranje žalbi, putem ugovornog organa, Općine Maglaj, u roku od deset dana od dana prijema ove odluke.

DOSTAVLJENO:

1. Ponuđači – putem maila
2. Služba za urbanizam, geodetske i imovinsko-pravne poslove
3. Web stranica
4. a/a

